

Пайғамбар соллаллоҳу алайҳи ва саллам ҳақларида чуқур кетиш

[Ўзбекча – Uzbek – الْأَوْزَبْكِي]



Шайх Саидахмад Самарқандий



Мұхаррир: Абу Абдуллоҳ Шоший

الغلو في حق النبي صلى الله عليه وسلم

[Ўзбекча – Uzbek –] الأوزبكي



الشيخ سعيد أحمد السمرقندى

٢٠٢٢

مراجعة: أبو عبد الله الشاشي

Бисмиллахир роҳманир роҳим

Расулуллоҳ соллаллоҳу алайҳи ва саллам у зотни улуғлаш ва мадҳ этишда чуқур кетиш ва ҳаддан ошишдан қайтардилар. Энди у зотдан бошка инсонларни улуғлаш ва мадҳ этишда ҳаддан ошишга келсак, бу борада эҳтиёт бўлишга янада ҳақлироқидир. Чунки бу ишлар яратган зот Аллоҳнинг ҳаққига мавжудотларни шерик қилишга олиб боради. Шу боис Расулуллоҳ соллаллоҳу алайҳи ва саллам одамлар у зотни мадҳ этарканлар, чуқур кетишдан қайтариб, шундай дедилар: “Мени худди насоролар Исо ибн Марямни ҳаддан ортиқ мадҳ қилишганидек, кўкка кўтариб мақтаманглар. Мен бор йўғи бир бандаман. Мени “Аллоҳнинг бандаси ва Расули” деб айтинглар” (Бухорий ва Муслим ривояти). Яъни, “Мени мақтар экансиз, худди насоролар Исо ибн Марям тўғрисида чуқур кетишиб, ҳаттоки унинг худо эканини даъво қилишгани каби, ҳаддан ортиқ мақтаб юбормангизлар. Балки мен бир бандаман. Мени Аллоҳнинг бандаси ва Расули, деб айтинглар. Раббим мени ана шундай сифатлагани каби сизлар ҳам шундай сифатлангизлар, ундан нарига ўтмангизлар”.

Аллоҳ таоло дейди: “**Бандасига Китоб, (яъни Қуръон)ни нозил қилган Аллоҳга ҳамд бўлсин**” [Кахф: 1], “**Бандасига Фурқон (яъни ҳақ билан ботил ўртасини ажратувчи Қуръон)ни нозил қилган Зот хайр-баракаси доимий ва мўл-кўл бўлган Зотдир**” [Фурқон: 1], “**Албатта, қачонки Аллоҳнинг бандаси (яъни, Мухаммад алайҳис-салом) У зотга даъват қилган ҳолда турганида, улар (яъни мушриклар унинг Қуръон ўқиши ва**

тавхидга даъват қилишини эшитиб ғазабга мингандаридан) унинг устига ғуж-ғуж бўлиб ёпирилишга яқин бўлдилар” [Жин: 19].

Юкоридаги оятларда кўриб турганингиздек, Аллоҳ таоло суюкли Пайғамбарини энг улуғ ўринларда “банда” дея сифатлади, шунингдек, бошқа кўп ўринларда “Эй Расул” ёки “Эй Набий” дея хитоб қилди. Ўзини мусулмонмиз дея даъво қилувчи мушриклар эса Расулуллоҳ соллаллоҳу алайҳи ва саллам бўйруқларига хилоф иш тутиш, қайтарган ишларига қўл уришдан бошқасига рози бўлмадилар. Пайғамбар соллаллоҳу алайҳи ва салламни у зот қайтарган ва огоҳлантирган сифатлар билан улуғладилар, у зотнинг кўрсатмаларига буткул зид иш тутдилар. Улар бу чуқур кетиш ва ширкларида насороларга ўхшаб қолдилар. Пайғамбар соллаллоҳу алайҳи ва саллам ҳаққида хаддан ошиб, очиқ ширкдан иборат назмий ва насрый асарлар ёздилар. Масалан, Бусирий ўзининг “Ал-бурда” номли қасидасида Пайғамбар соллаллоҳу алайҳи ва салламга хитоб қилиб, жумладан шундай дейди:

Эй халойиқнинг сарвари – мукаррами!

Сендан ўзга бошпанам йўқ, бош ургани

* * *

Бусирий қасидасининг юқорида зикр қилинган ва келгуси байтларида Пайғамбар соллаллоҳу алайҳи ва салламдан ҳожатини сўраб дуо қиласи, бошига оғир мусибатлар тушганида, энг танг ҳолатларда у зотдан бошпана ва ҳимоя сўраб мурожаат қилиши ва мушқулини осон қилишини сўраб илтижо қилишини

айтади. Бинобарин, бу ишлар ёлғиз Аллоҳдан сүраладиган ишлар эканини унугади. Бунга сабаб, шайтон Бусирийга ва унга ўхшаш шоирларга ушбу қабих амалларини чиройли суратда күрсатди, гарчи катта ширк бўлсада, Пайғамбар соллаллоҳу алайҳи ва салламни мадҳ этиш борасидаги бундай ҳаддан ошишни у зотни яхши кўриш ва улуғлаш шаклида зоҳир килди. Аксинча, Расулуллоҳ соллаллоҳу алайҳи ва саллам ҳақларида чуқур кетмаслик тўғрисидаги суннатга риоя қилишни эса, у зотни ёмон кўриш ва камситиш суратида кўрсатди. Аслини олганда, Пайғамбар соллаллоҳу алайҳи ва салламни чинакам камситиш – у зотнинг ўзларини мақташ борасида ҳаддан ошмаслик тўғрисидаги кўрсатмаларига амал қилмаслик, сўз ва хатти-ҳаракатларида у зотга эргаш-маслик ва чиқарган хукмларига рози бўлмасликда. Пайғамбар соллаллоҳу алайҳи ва салламни улуғлайман ва яхши кўраман деган инсон, у зотга эргашиши, у кишининг дини ва суннатига ёрдам бериши зарур. Абдуллоҳ ибн Шиххийр розияллоҳу анҳудан ривоят қилинади: “Бани Омир қабиласи одамлари ичida Расулуллоҳ соллаллоҳу алайҳи ва салламнинг ҳузурига бордим. Биз у зотга қаратса: “Сиз саййидимиз ва саййидимизнинг фарзандисиз” – дедик. Расулуллоҳ соллаллоҳу алайҳи ва саллам: “Саййид (деб номланишга ҳақиқий лойиқ зот) Аллоҳ таборака ва таолодир” – дедилар. Биз: “Сиз энг мартабаси улуғимиз ва хайру эҳсони кўпимизсиз” – дедик. Шунда Расулуллоҳ соллаллоҳу алайҳи ва саллам: “Ўзларингни гапларингни айтаверинглар (яъни Расул ёки набий каби сўзлар билан мурожаат қилинглар) ёки шу гапларингни баъзиларинигина айтинглар. Шайтон

сизларни ўзига вакил қилиб олмасин (яни шайтон яхши кўрган сўзларини сизларни тилингизда сўзлатиб кўймасин) – дедилар”¹.

Кўриб турганингиздек ҳадисда Пайғамбар соллаллоҳу алайҳи ва саллам қавмнинг “Сиз бизнинг саййидимиз” деб айтишини хушламадилар ва чинакам саййидликга ҳақли зот Аллоҳ эканини билдирилар. Шунингдек, уларни “Сиз энг мартабаси улуғимиз ва хайру эҳсони кўпимизсиз”, деган баландпарвоз гапларни айтишдан ҳам қайтардилар. Бу сифатлар Пайғамбар соллаллоҳу алайҳи ва салламга том маънода тўғри келса-да, бироқ уларнинг чуқур кетишидан кўрқдилар, уларнинг Пайғамбар соллаллоҳу алайҳи ва салламни бу каби мадҳ ва мақтовлар билан қарши олишини, охир-оқибат, у зот хусусида ҳаддан ошишларини истамадилар. Уларга танбех берар эканлар “Шайтоннинг вакили ва чопарига айлануб қолманглар” дея, маддоҳликнинг мудхиш оқибатидан огоҳлантирилар. Инсонни гарчи унда мавжуд сифатлар билан бўлсада юзига мақташ шайтоннинг амалидан эканини баён қилдилар. Негаки, бу мақталувчининг кеккайишига сабаб бўлиб, ундаги тавҳиднинг камолига путур еткизиши, шунингдек, мақтовчининг ҳам мақталувчи шахс ҳақида ҳаддан ошиб, уни ҳақли бўлмаган мартабага чиқариб кўйиши мумкин. Шунингдек, Расулуллоҳ соллаллоҳу алайҳи ва саллам умматларини у зотни ортиқча мақтаб юборишлиқдан қайтардилар. Чунки бу бора-бора ширкка ва Пайғамбар соллаллоҳу алайҳи ва салламни

¹ Абу Довуд (4806) “жайийд” санад билан ривоят қилган.

рубубият сифатлари билан сифатлашга олиб бориши мүмкін. Дарҳақиқат, шундай бўлди ҳам! Юқорида айтиб ўтганимиздек, Расулуллоҳ соллаллоҳу алайҳи ва саллам ҳақида ҳаддан ошган “Ал-бурда” қасидасининг муаллифи Бусирий ва унга ўхшаш айрим шахслар Пайғамбар алайҳиссаломга бағишлиб ёзган қасидалар кишини диндан чиқарадиган ширк сўзларни ўз ичига олган:

Эй халойиқнинг сарвари – мукаррами,
Сендан ўзга бошпанам йўқ, бosh ургани.

* * *

Икки дунё – сен улашган фазлу карам.
Илму-ирфонингдан эрур – Лавҳу қалам.

* * *

Аллоҳ субҳанаҳу ва таоло Пайғамбар соллаллоҳу алайҳи ва салламга убудийят (бандалик) мақомини мукаммал қилгач, бу мақомни асраб-авайлаш, ақидани ҳимоя қилиш учун мадху мақтовни хушламас эдилар. Шунингдек, умматларига ҳам яхшиликни раво кўрганлари учун, тавҳид мақомини бузадиган ёки заифлаширадиган ширк ва ширкка элтувчи турли сабаб ва воситалар киришидан ҳимоя қилиш мақсадида мўминларни бундай сўз ва хатти-харакатлардан огоҳлантиридилар. Юқорида ишора қилиб ўтганимиздек, саҳобаларни у зотга қаратса айтишган “Сиз бизнинг саййидимизсиз”, деган гапдан қайтардилар.

Ибнул Асийр “Ан-ниҳоя” китобида шундай дейди: “Саййид сўзи – “эга, мулкдор, улуғ-шарофатли, фозил,

саҳоватли, ҳалим, қавмининг озорига бардош берувчи, эр, раис ва пешво” маъноларини ифода этади. Расууллоҳ соллаллоҳу алайҳи ва саллам ҳадиси шарифдаги “Сайид Аллоҳдир” деган сўзлари билан “Ҳакиқий саййидлик Аллоҳга хос, бандалар эса, У зотнинг қулларидир” деган маънони назарда тутдилар. Агар “сайид” сўзи Аллоҳ таолога ишлатилса, “Молик, Мавло ва Раб” маъноларида ишлатилади. Ибн Аббос розияллоҳу анҳумо шундай дейди: “Аллоҳ Сомад, яъни ҳукмронлик ва пешволикнинг барча турларида мукаммал бўлган Сайиддир”.

Ҳадисда келишича, Пайғамбар алайҳиссаломнинг ҳузурига Қурайш қабиласидан бир киши келиб, “Сиз Қурайш саййидисиз”, дейди. Шунда у зот: “Сайид Аллоҳдир”, деб жавоб қиласидар. Яъни, чинакам саййидликга ҳақли зот Аллоҳдир, деган маънони назарда тутдилар. Гёёки Пайғамбар соллаллоҳу алайҳи ва саллам тўғридан-тўғри юзларига мақталинишини ёмон кўрганлари ва тавозени хуш кўрганлари учун шундай дейдилар.

Энди, “Мен Одам боласининг саййидиман, аммо фаҳрланиш йўқ”, деган ҳадисга келсак, Расууллоҳ соллаллоҳу алайҳи ва саллам бу сўзни Аллоҳ таоло у зотни эъзозлаб, у зотга инъом этган фазилат ва пешволикни маълум қилиш, Аллоҳ берган неъматни ёд этиш ва умматларининг у зотга бўлган иймони ана шу фазилат ва пешволикка лойиқ ва муносиб бўлишини билдириб қўйиш учун айтдилар. Шу боис, ортидан “аммо фаҳрланиш йўқ”, деб қўшиб қўйдилар. Яъни “менга берилган бу фазилат Аллоҳнинг менга ато этган каромати – улуғлашидир. Мен бу мартабага

ўз саъй-ҳаракатим, куч-имкониятим ила эришганим йўқ. Шу боис, бу фазилат билан фаҳрланишга ҳаққим йўқ” (иктибос тугади).

Дарҳақиқат, Пайғамбар соллаллоҳу алайҳи ва саллам ўзлари айтганларидек, у зот Одам болала-рининг саййидидирлар. Бироқ Бани Омир қабиласи-нинг одамлари Пайғамбар соллаллоҳу алайҳи ва салламга ушбу сўзлар билан хитоб қилишгач, ширкка олиб бориш эҳтимоли бўлган муболагадан қўркиб, уларни бу сўзни айтишдан қайтардилар. Буни Анас ибн Молик ривоят қилган қуйидаги ҳадис янада ойдинлаштириб беради: “Бир қанча одамлар Пайғам-бар соллаллоҳу алайҳи ва салламга хитоб қилишиб: “Эй яхшимиз ва яхшимизнинг фарзанди, эй саййиди-миз ва саййидимизнинг фарзанди” – дедилар. Шунда Расулуллоҳ соллаллоҳу алайҳи ва саллам: “Эй одамлар, ўзларингизнинг (одатдаги) гапларингизни айтаверинглар. Шайтон сизларни (ширк, бидъат ва ҳаддан ошишиш каби) ўзи яхши кўрган ишларга бошламасин. Мен Мұҳаммад – Аллоҳнинг бандаси ва Расулиман. Мени Аллоҳ азза ва жалла раво кўрган мартабадан юқори мартабага кўтаришингизни хуш кўрмайман” (Насоий “жайийд” санад билан ривоят қилган).

Мазкур ҳадис Пайғамбар соллаллоҳу алайҳи ва саллам нега уларни “Эй саййидимиз”, дейишдан қайтаргандарини янада очиқроқ баён қилиб беради. Расулуллоҳ соллаллоҳу алайҳи ва саллам умматла-рининг пайғамбарлари ҳақида чуқур кетишидан қўрқанлари учун шундай дедилар. Шу боис, бу эшикни бошиданоқ ёпиб, умматларини у зотни

убудият мартабаларининг энг юкориси бўлган, Аллоҳ таоло Куръони Каримнинг бир қанча ўринларида пайғамбарини сифатлаган икки сифат: Аллоҳнинг бандаси ва Расули деган сифат билан сифатлашни тавсия қилдилар. Тавҳидни ҳимоя қилиш учун одамлар у зотни Аллоҳ насиб қилган мартабадан юкорисига кўтаришларини асло хуш кўрмадилар. Расулуллоҳ соллаллоҳу алайҳи ва салламнинг бу маънодаги сўзларини ҳадисларда кўп учратиш мумкин. Бунга юкорида айтиб ўтган: “Мени худди насоролар Исо ибн Марямни ҳаддан ортиқ мадҳ қилишганидек, кўкка кўтариб мақтаманглар. Мен бор йўғи бир бандаман. Мени “Аллоҳнинг бандаси ва Расули” деб айтинглар” (Бухорий ва Муслим ривояти), деган ҳадис ҳам мисол бўлади. Ундан ташқари бошқа бир ҳадисда Расулуллоҳ соллаллоҳу алайҳи ва саллам шундай дейдилар: “Албатта (бошга бирон мусибат тушганида ёки ёрдамга муҳтож бўлинганда) мендан мадад сўралинмайди, балки (бундай вақтда ёлғиз) Аллоҳ азза ва жалладан мадад сўралади”.

Қолаверса, Пайғамбар соллаллоҳу алайҳи ва саллам одамлар ўзаро бир-бирларини мақташидан ҳам қайтардилар ва бунинг ёмон оқибатидан огоҳлантири-дилар. Бир биродарини мақтаган кишига қаратса: “Хой нодон, ўртоғингнинг бўйини кесдинг (яъни бу мақтовларинг билан унинг ҳалокатига сабабчи бўлдинг)”. Шунингдек, Пайғамбар соллаллоҳу алайҳи ва саллам: “Агар маддоҳларни кўрсангиз, уларнинг юзига тупроқ сочингизлар” – дейдилар. Бунга сабаб, мақтовчининг мақталинувчи шахс ҳақида чуқур кетиши ҳамда мақталувчи шахснинг мақтov туфайли кеккайиши, аксар ҳолатларда ўзида мавжуд бўлмаган

мақтовларга берилиб, унда манманлик ва калондимоғлиқ хислатлари пайдо бўлишининг олдини олишдир. Зеро, маддоҳлик мақтовчининг ҳам, мақталинувчи нинг ҳам динига путур еткизади.

Шу ўринда бир масала бор: бирон кишига “сайийд” деб мурожаат қилиш жоизми?

Аллома Ибн Қайим роҳимаҳуллоҳ айтади: “Уламолар инсонни саййид деб аташ жоиз ёки йўқлигига ихтилофлашдилар. Баъзи уламолар буни ножоиз деганлар ва бу фикр Имом Молиқдан нақл қилинган. Улар бу фикрларига юкорида келтирилган ҳадисни ҳужжат қилганлар: “Сайийд Аллоҳ табарока ва таолодир”.

Бошқа бир жамоат уламолар инсонни саййид деб аташни жоиз деганлар. Улар Пайғамбар соллаллоҳу алайҳи ва салламнинг ансорларга қаратади: “Сайидингизга (ёрдам бериш учун) ўрнингиздан туринглар”, деган сўзларини ҳужжат қилишларига келсақ, маълум бўлишича, у зот бу сўзни бевосита Саъднинг ўзига айтмадилар. Демак, масаланинг ўзи хос тафсилотлари бор” (иктибос тугади).

Ушбу масаладаги тафсилотлардан мақсад, Аллоҳдан бошқани саййид дейишдан кайтарилган далилларга кўра, бирон инсонни бевосита юзига мақтаб “сайийд” дейиш жоиз эмас. Аллоҳдан бошқани

IslamHouse.com

сайыйд дейиш жоизлигини ифода этадиган далилларга кўра, бу сифатга лойиқ бўлган инсон ҳақида, унинг юзига айтмасдан сайыйд дейиш жоиздир, валлоху аълам.

Манба: Ихлос орг веб саҳифаси

